



CWTSH MYRDDIN

Rhifyn – 21.12.2018

Dathlu Deugain Ysgol Bro Myrddin

Pleser o'r mwyaf oedd cael croesawu theatr lawn o rieni, cyn-rieni, disgyblion, cyn-ddisgyblion a ffrindiau ar nos Sadwrn y 1af o Ragfyr i gyd-ddaethlu penblwydd yr ysgol yn 40 oed.

Mwynhawyd gwledd o ganu yng nghwmni Rhys Meirion a chorau amrywiol yr ysgol. Cyflwynwyd y noson gan y cyn-ddisgybl, Heledd Cynwal a thri o gyn-benaethiaid yr ysgol oedd y llywyddion, Mr Gareth Evans, y pennaeth cyntaf, ei olynydd Mr Eric Jones a'i olynydd yntau Mr Dorian Williams. Pleser oedd gwranddo ar sylwadau ac atgofion melys Mr Gareth Evans a siaradodd ar ran y tri cyn-bennaeth. Pleser hefyd oedd cael clywed, am y tro cyntaf, cerdd gomisiwn y dathlu a ysgrifennwyd gan y prifardd a'r cyn athro a rhiant Tudur Dylan ac a gyfansoddwyd gan



Mr Eric Jones. Lansiwyd CD y dathlu ar y noson hefyd. Bellach mae'r CD ar gael i'w phrynu o'r ysgol am £10 yn unig. Diolch i'r holl staff a'r disgyblion a weithiodd yn ddiflino am fisoedd i sicrhau llwyddiant y gyngerdd yma. Roedd hi'n noson gofiadwy iawn.

CD Dathlu Deugain yr ysgol

Crëwyd y CD arbennig 'Dathlu'r Deugain' er mwyn dathlu deugain mlynedd o draddodiad cerddorol sydd wedi pontio'r cenedlaethau yn Ysgol Gyfun Gymraeg Bro Myrddin. Amrywia y 'repertoire' o'r clasurol i'r newydd gyda dau gant o ddisgyblion wedi bod yn rhan o'r profiad. Mae'r gân gomisiwn 'Hyder yn ein cân' (geiriau gan Tudur Dylan Jones a'r gerddoriaeth gan Eric Jones) yn pwysleisio'r atgofion ac yn diolch am y cyfleoedd a gynigwyd drwy'r ysgol arbennig hon. Yn sicr, fe fydd y profiad o fod yn rhan o'r traddodiad cerddorol hwn yn aros gyda'r disgyblion am weddill eu hoes.



Ymddeoliad

Pob dymuniad da i Mrs Gill Herbert-Evans sy'n ymddeol ar ddiwedd y tymor. Bu'n gweithio yn ddiwyd yn yr adrannau Ieithoedd Tramor Modern a Saesneg ers 20 mlynedd. Diolch iddi am yr holl waith.

Taith yr Adran Fathemateg

Ar ddydd Mawrth 11eg o Ragfyr, bu nifer o ddisgyblion blwyddyn 10 ar wibdaith i wrando ar ddarlithoedd y "Maths Inspiration" yng Nghaerdydd. Cawsant fore diddorol iawn yn gwrandao ar wahanol gyflwyniadau gan nifer o siaradwyr hwylus a bywiog gan gynnwys Rob Eastaway a Ben Sparks. Thema'r bore oedd y mathemateg tu ôl i gemau. Cafodd y disgyblion siawns i chwarae sawl gêm gyda nifer ohonynt yn cael cyfle i fynd ar y llwyfan ac ennill siocled ac arian! Teimlwn fod y profiadau tu allan i'r dosbarth yma wedi ehangu gorwelion ein disgyblion, a dangos iddynt fod mathemateg yn cael ei ddefnyddio ym mywyd pob dydd.



Cynnau Coeden Nadolig Morrisons

Ar nos Wener y 1af o Ragfyr aeth criw o ferched o flynyddodd 7,8 a 9 i ganu carolau tu allan i siop Morrisons er mwyn dathlu cynnau goleuadau'r goeden. Canwyd amrywiaeth o garolau dan arweiniad Mrs Nia Evans.



Band yr Ysgol yn chwarae yn siop Morrisons

Cafodd deg ar hugain o ddisgyblion pres a chwythbren yr Ysgol brofiad pleserus bore Llun olaf y tymor, sef Rhagfyr 17eg yn diddanu siopwyr prysur siop Morrisons.



Senedd Ieuencid

Llongyfarchiadau gwresog i Lois Campbell a Cai Phillips ar gael eu hethol yn aelodau o'r Senedd Ieuencid. Bu dros 450 o ymgeiswyr ledled Cymru yn cystadlu am 60 sedd. Etholwyd Lois fel aelod dros Ddwyrain Caerfyrddin a Dinefwr a Cai fel elod dros Orllewin Caerfyrddin a De Sir Benfro. Anrhydedd yn wir yw bod dau ddisgybl o'r ysgol yn aelodau yn y senedd newydd, arloesol hon.

BRO MYRDDIN YN ENNILL TLWS EISTEDDFOD DDWL MENTRAU IAITH GORLLEWIN SIR GAR 2018

Bu dathlu Cymreictod mewn steil ar ddydd Mawrth, yr 20 fed o Dachwedd yn Neuadd Pontyberem lle bu criw o Flwyddyn 7 a'r Chweched Dosbarth yn fuddugol yng nghystadleuaeth Eisteddfod Ddwl Mentrau Iaith Sir Gâr 2018. Bu cystadlu brwd drwy'r dydd yn perfformio'r haca, y sgets, ras bwyta cracers o dan bwysau, ras gyfnewid balw̄ns, canu i gerddoriaeth, stori a sain a sawl cystadleuaeth hwyl arall. Bu chwerthin, sbri, miri a dathlu. Gwelsom ddisgyblion hynaf ac iau'r ysgol yn cydweithio i greu a dathlu ein diwylliant. Diolch i'r holl chweched a fu'n sgriptio a hyfforddi dros y misoedd diwethaf, a llongyfarchiadau i bawb.

Canolfan Rhagoriaeth mewn Addysg Ariannol



Derbyniodd yr ysgol achrediad "Canolfan Rhagoriaeth mewn Addysg Ariannol" oddi wrth Young Money, sef elusen addysg ariannol, mewn cynhadledd ym Mirmingham ar y 13^{eg} o Dachwedd. Nod cyffredinol rhaglen y Ganolfannau Rhagoriaeth yw cefnogi addysg ariannol ymarferol, effeithiol a chynaliadwy i bobl ifanc mewn ysgolion. Ysgol Bro Myrddin yw'r ysgol Uwchradd Gyntaf yng Nghymru i gyflawni'r achrediad.

Rhai o ddisgyblion blwyddyn 12 wnaeth elwa o'r addysg ariannol yma'r llynedd.

Ffair Aeaf yn Llanelwedd

Llongyfarchiadau i Gilbert Roberts ar ennill gwobr y pencampwr yng nghystadleuaeth y Tywyswyr Ifanc yn y Ffair Aeaf yn Llanelwedd.



Bugail y Flwyddyn 2018

Llongyfarchiadau i Sara Brown o flwyddyn 11eg am ennill teitl Bugail y flwyddyn 2018.

Gwobr Addysg Drummond 2018

Ar 20fed o Dachwedd teithiodd Millie Hughes-Butterfield o flwyddyn 12 gyda'i athrawes Mrs Non Knott i'r Royal College of Physicians yn Llundain i dderbyn y 'British Nutrition Foundation Drummond Education Award 2018'. Cafodd Millie ei chydabod a'i gwobrwyo am y gwaith gorau ym Mhrydain yn y cwrs TGAU Bwyd a Maeth ar ran y bwrdd addysg CBAC.

Cyflwynwyd tystysgrif a gwobr ariannol i Millie gan y Dywysoges Frenhinol Anne. Llongyfarchiadau Millie.



Ymweld â Chartref yr Henoed, Caeglas, Ffairfach, Llandeilo – Bore Mercher, Rhagfyr 19eg

Mae hi'n arferiad bellach i'r Adran Gerdd ymweld â chartref yr Henoed adeg y Nadolig, ac roedd hi'n hyfryd eleni i fynd a chriw o ddisgyblion BI 12 a 13 i gyflwyno rhaglen Nadoligaidd i Gartref yr Henoed yng Nghaeglas, Ffairfach, Llandeilo. Cafwyd amrywiaeth safonol o eitemau unigol a deuawdol yn ogystal ag ambell eitem offerynnol. Yna, cafwyd datganiad o sawl carol gan y parti cyfan. Roedd awyrgylch hyfryd yn y cartref, gyda'r preswylwyr yn amlwg yn mwynhau'r arlwy Nadoligaidd. Fe wnaeth y merched a'r athrawon fwynhau paned a mins peis hyfryd ar ddiwedd eu rhaglen, cyn ei throi hi nôl at yr ysgol.

Gwasanaeth Diwrnod Olaf y Tymor

Ar ddiwrnod olaf y tymor sef Dydd Gwener y 21ain o Ragfyr, roedd hi'n hyfryd cynnal Gwasanaeth Nadolig yn neuadd yr ysgol. Llywiwyd y Gwasanaeth gan y prif swyddogion: Efa Jones a Harri Jones ac roedd hi'n braf croesawu'r Parch Beti Wyn James i ymuno â ni. Cafwyd amrywiaeth o ddarlleniadau, gweddïau a charolau. Cafwyd hefyd ddatganiad o ambell eitem a berfformiwyd yng Nghyngerdd Dathlu Deugain yr Ysgol yn Theatr y Lyric. Daeth y gwasanaeth i ben gyda'r ysgol gyfan yn canu "Nadolig Llawen i chi gyd".